

ITERANIBA N AONON TE BETEBEKE

TE RONGORONGO MAN TE ITINGAUN N TE AONO

Kakabwaia ni Bitakin te Maiu n te Mwakuri ni Mitinare ae Bwanin Taina

Iroun Unimwaane Peter F. Meurs n te Itingaun

N te 1957 Unimwaane Ericson ao Unimwaane Jones a kanakoaki nako Warrnambool Victoria, Aotiteria bwa moan ni mitinare. A tia ni kakaae ma te korakora ibukin 3 namwakaina ma teutana te nakoraoi imwain ae a karebwerebwe iaon mataroa ni kabanea n te taun—Jamieson Street, ike a maeka iai au karo. E a tia tamau n ikawai rake n te utu ae a matoatoa n te Katorika i Holland. Tinau bon kaain te utu ni Kiritian mai Aotiteria. A rangin ni kakaonimaki n tataro ao ni ukeukera te koaua ngke a karebwerebwe mitinare iaon aia mataroa. A butimwaia, ao imwiina a kunea koauan te eungkerio mai imwiin aia kametabwai n te Nu Tetemanti mai imwaina. Ngkai te roro ae kakaokoro n ana utu Meurs a rikirake inanon te eka-retia, ti na teimatoa ni kakaitau ibukin Unimwaane Ericson ao Unimwaane Jones—mitinare aika onimaki ao ni beku korakora ake a teimatoa ni ukoukora te nano ae itiaki ni karokoa ae a kaan roko n te kabanea ni mataroa, n te kabanea ni kaawa i Warrnambool.

N te 1974 I beku bwa te tia ibuobuoki nakon Bitiobi Hank Kruizinga n aia kooram Ibonga. Bon te tia anainano ae korakora

ni maiu ao n teimatoa ni buokai ni katauraaoi ni karaaoan au mwakuri ni mitinare. I baireia bwa N na kamatebwaia te intiniia ao ni koroboki nakon te tia tararua ni bubuti taonakin au reirei n te maan ae uoua te ririki. A kaeka ao ni kangai bwa N na kabua au mwakuri ngkana aki rokou e riaon teuana te ririki. I iangoia bwa e kakawaki irou karaaoan au reirei ai ngaia are n na aki kona ni karaoa te mwakuri ni mitinare ae bwain taina.

Inanon Okitobwa n te ririki anne I tekateka n Umwantabun te Uoote ae Caulfield i Melbourne ni kakauongo nakon te tetere n te Nakoanibonga n te maungatabu ni Kabuta iaon te reitaki n te tareboon. Beretitenti Spencer W. Kimball e taekina taekan te ataeinimwaane David, ao ara Koria ake ti kaitara ma ngaii inanon maiura. Ngkanne, I uringa anne ngke e taekin taeka aikai ae kanga e taetae ni kaineti nakoiu: “Ti kani kauring ngkami riki ataeinimwaane, tabemi bwa kam na kaeka te wewete anne. Ao ngkana kam karekea ana wewete te Uea rinanon am bitiobi ao am beretitentii n titeiki, bon te bwai ae kaineti nakoi, ma kabaeakim naba, ni kanoa te wewete anne ma te konabwai. . . Ko (kona)



ngkai ni katea am kouru ni kanoa te mition.”¹

**Unimwaane
Peter F. Meurs
man te Itingaun**

E a tia n taetae nakoiu te Burabeti, ao rinanon ana wiriki-riki te Tamnei ae Raoiroi ae moan te korakora I ataia ngkanne bwa I riai ni karaoa au mition, ao te Uea e na katauraoa te kawai.

Anne raoi te bwai ae riki. I karin au beebs, I a weteaki bwa N na beku n te New Zealand Auckland Miton ao ni koroboki nakon te Iuniwetiri n tuangia bwa N na taonna ibukin uoua te ririki. Imwain ae I nako Nu Tirau I koroboki rikaaki ao a kariaia au bubuti.

Au atatai n au mition e bitai n akea tokina. Ni maiu ibukiia naake ko reireiniia, n rangin ni katabeaki ni booki aika tabu,



n tia n reireinaki ao ni buokaki irouia beretitenti n te mition aika tamara, ao ni beku ma toam ni kabane man taabo aika kakao-koro e a tia n teimatoa ni kakabwaiaai ni karokoa te bong aei. I a tia ni karekei tibwanga aika mwaiti n te aonaaba ni bitineti ao n intinia. Ngkana I titirakinaki bwa I karekea mai ia taian reirei ake a tia ni buokai n nakoraoi I taekinna bwa bon man au atatai ngke I mitinare n ae bwanin taina inanon uoua te ririki i New Zealand are a kakorakora riki kabwaiau.

N ara bong, iaan ana kaetieti te Burabeti ae maiu, Thomas S. Monson ti a tia ni manga kau-ringaaki n aron kakawakin ao te kakabwaia man karoan te

mwakuri ni mitinare ae bwanin taina. N te Maungatabu ni kabuta are karoaki n Okitobwa 2010 e taku “I kona n taekina te bwai ae kaan riki ma nanou. . . . Te moan ngkami ataeinimwaane n te nakoanibonga ae te Aaron ao nakoimi ataeinimwaane aika kam nang riki bwa Unimwaane—I kaoka te bwai ae a kaman reirei iaona burabeti—bwa ni kabane ataeinimwaane aika a tau a riai ni katauraoi ni karaoa aia mitinare. Te mwakuri ni Mitinare bon ana mwakuri te nakoanibonga te kabaeaki ae kantaningaira te Uea bwa e na mwaiti ae ti na anganako.

N taetae nakoia Kairake n Ataeinaine e reitianako: “Te taeka nakoimi ataeinaine: e ngae ngkai

akea iroumi te katabeaki n te nakoanibonga ae ti tebo ma are irouia ataeinimwaane bwa a na beku bwa mitinare aika bwanin aia tai, ko karaoa naba te ibuobuoki kanga aroia mitinare, ao ti butimwaea ami mwakuri n ibuobuoki.”²

N arora n tatabemanira nako, utu ao taan kairiiri ti a tia ni kaeka bwanaan te Burabeti ni kabuta te Betebek, bubua ataeinimwaane ao ataeinaine riki ae a tia n rin n te tabo ni mitinare, ni biti maiuia ao naake a reireiniia n aki toki.

N Okitobwa 2012 n tain te tete ni kaukuki n te maungatabu ni Kabuta Beretitenti Monson e kakukureia kaain te ekaretia ni kabane ma te katanoata ni



kauarerekean te ririki ni mitinare. E taku . . . “I kukurei ni katanoata bwa man te tai ae waekoa ao ni kabane ataeinwaane aika a tau ake a tia ni kareke beebea n te rei-rei ae rieta ke ane bootau ma ngaia, n aki tabe bwa a maeka iai, e na reke aia tai n rineaki ibukin te mwakuri ni mitinare te ririki ae 18, irarikin are 19 te ririki” ao ni kaineti ma ataeinaine aika onimakinaki “ataeinaine aika tau ae iai nanoia ni kan beku a kona n rineaki ibukin te mwakuri ni mitinare ni moa man te ririki 19, irarikin are te ririki 21”³.

Ataeinimwaane ao ataeinaine ni kabuta te ekaretia a tia ni kaeka bwanaan te burabeti’. Ni kamaakaia mitinare aika boou aikai n Turai n te ririki aei 58

mitin aika boou ake a tia ni kateki. Man Aokati 2013 mwaitia mitinare ni kabuta te aonaaba e a kaman tia ni keerake nakon ae raka iaon 75000.

Tera ae ti kona ni karaopia n ira raoi te kairiiri ao ana reirei ana burabeti te Atua?

I kona n anga:

Kairake n Ataeinimwaane ao Ataeinaine—irarikin are bon oin am tataro ao kamatebwai man booki aika tabui aika ko kona n iri karikurum aika boou ibukin kiraati n te mweenga, ao n te taromauri. A na rangin ni ibuobuki kiraati aikai ni karikirakea te onimaki, te koaua ao te atatai are kokainnanoia n riki bwa mitinare aika kam korakora ma ni mwaaka.

Kaaro ao Tiina—ataa te tabe ae tamaroa are ko kamwakuria ni buokiia natim ni katauraoi n riki bwa ana toro te Uea ae bwanin taina. Am onimaki, am kakoaua, ao am mwakuri n ibuobuki e katea te katooto ae korakora nakoia natim.

Nakoanibonga ao taan kai-ri ni Bootaki—ni moanaki man te Buraimwari ao ni mwakuri ni karoko irouia Kairake n Ataeinimwaane, Kairake n Ataeinaine ao ririki n Reirei n Tabati—ataia bwa am kirati a boni manena raoi ibukin am katauraoi nakon am mwakuri ni mitinare.

Kauntira n te Uoote
ao Kauntira n te Titeiki—
Kabonganaia raoi mitinare ake a bane aia tai bwa a na buokiko ni katauraoia mitinare n taai aika ana roko. Bon taan reirei aika mwaatai ni Kiraati ni Katauraoi ni Mitinare n Taetaekinan Au Euangkerio. A karaoi naba reirei aika tamaroa ao toaia n reirei ni kakawari ibukin katauraoakia mitinare ao a oota ao a tauraoi n ibuobuki n iteran nako te Mwakuri ni Kamaiu

Ai te kakabwaia tera ngkai ti kairaki iroun ana Burabeti te Uea ae koaua. Au kantaninga bwa ti na kaeka ana wewete ao ni buokiia aika mwaiti riki ara rororrikirake ni karekei kakabwaia man te mwakuri ni mitinare. ■

NOTES

1. Spencer W. Kimball, “The David’s and the Goliaths,” *Ensign*, Nov. 1974.
2. Thomas S. Monson, “As We Meet Together Again,” *Ensign*, Nov. 2010.
3. Thomas S. Monson, “Welcome to Conference,” *Ensign*, Nov. 2012.

Karimoa moa te Uea n tainako

Iroun Lita K. Iabeta

Bon te bwai ae tamaraoa n norakina bwa a kangaataein te reirei ni kawakina te euangkerio inanoia ao ngkanne n tara korakoran aia atatai mai itinani-kuia, ao korakoran aia koaua.

N te ririki ae nako teniman ara ataei man Koraki 7 a mena araia ibuakoia ataei ake a reke nakon te tikaoratibu are e na mwanenaki mai Aotiteria ao Nu Tiran. Ngkana Teitirake Teanoa, Karori Taukeke ao Lomitusi Iabeta e nakoraoi mwiin aia reirei, a na kona n nako Aotiteria, Nu Tiran ke Iuniwetiri riki tabeua n te aono.

Te tikaoratibu i Kiribati, e nanonaki n te aonaaba ni bwaninnakoia angjin te I-Kiribati ae aki kona ni kabwaka mwane ibukin oin aia reirei. Ni kangai “tiaki” nakon te tikaoratibu bon taekinan “tiaki” nakon te mwane ae tamaraoa n taai aika ana roko. Ataein te reirei ni Kuura aika Rietaata ni kabuta te aonaaba n te karinan ae Koraki 6 ao Koraki 7 a uneakina te tikaoratibu anne, n te kauaba ae tabangaki n te aba. Araia aika a moanna a katanoataaki iaon te reerio, ao naake a moanna n te tikaoratibu bon aia kairiribai anggia ataeinimwaane ao ataeinaine n te aba anne.

N 2013, ataei aika a tau n anganaki te tikaoratibu a karaoa te rinerine bwa a na aki butimwaea te tikaoratibu ma a na nako ni karaoa aia mwakuri ni mitinare moa. Ngke e katanoata te bitaki n te ririki Beretitenti Monson, ataeinimwaane ao ataeinaine aikai n raonaki ma raoia n reirei, a iangoia bwa a na karimoa moa te Uea, ao e ngae ngke e katanoataaki n te reerio bwa a reke irouia te tikaoratibu imwin banen aia ukeukeu n tokin te ririki, n te tai anne ao a tiku n tataninga weteakia nakon aia mition.

Ngkai, Karori Taukeke e beku i Philippines Olongapo Mition, Lomitusi Iabeta e beku i Hawaii Honolulu Mition, ao Tetirake Teanoa e beku n te San Diego Mormon Battalion Historic Site Mition, ao mitinare aika tamaraoa aikai a karaoa te kao-koro ni maiuia aomata aika mwaiti. A taku, “eng

nakon te Uea moa, n ataia bwa a katuka ngkai aia onimaki iroun te Uea E na kauki winto ibukiia n okiia. Iai aia onimaki iaon berita ake a beritanaki iai bwa E na buokia ni kanakoraoa aia tai ae na roko, n atakina ae akea ngkai aia tikaoratibu ae a tia ni moanna iai. A mwaiti ngkai raoraoia ae a toua ngkai te kawai naba anne, ao 18 kaain aia kiraati ae a tia ni butimwaea te wewete, ao a beku ngkai bwa mitinare. ■

Mwanangau n Riki bwa te Mitinare

Iroun Toni Wayas (n aron are e taekinaki
iroun Tracy Kennar David)

Ni kan riki bwa te mitinare e a tia n riki bwa te kawai are e moanaki ngke itiuu au ririki. E ngae ngke tiaki kaain te ekaretia, te Tabati teuana e kairai tinau nakon aia bootaki kaain te LDS. E karoaki te bootaki n te kauoua ni burooa n te “Mon Wia” ke te titoa ae uarereke. Tinau e a tibwa tia ni kaboi kaau aika boou ibukina ao ibukiui. N aron te katei i Aban Mwatiare, ngkana ti roko n te kawai n rinnako nakon te titoa ti katikui ara kau ao ni waerake ni kaea te bootaki ni Moomon. Imwiin te bootaki, ti aki kona ni kunei ara kau aika boou. A bua. E rangin n un tinau. E uotai n oki nakon mweengara n akea ana kau. E tuangai bwa ti na aki manga nakon te aro arei ibukina bwa a kimoaki ara kau. Ma I tangira te reirei, ao I taku bwa a rangin n tangira ao n tamaraoa aomata, ngaia ae I teimatoa n nanako n taromauri. I tuanga tinau, “N te bong teuana, ngkoe ao Daddy kam na oki.” N au iango ao I taku bwa ngkana I kona n riki bwa te katooto ngkana I nakon te taromauri ni katoa Tabati, ana bon irai n nako n taromauri. Ma a bon aki.

Ngke e a koro au ririki ae 12, mwaneu ae e a ikawai riki e a moanna n iai nanona n te aro ao e bwabetitoaki. E karoai kawai aika kaokoro

aika raraoi ao I butimwaea te kaokoro. E tua-
ngaki bwa e na taetae. Imwain ana bwabetito,
e rangin ni mamaa ao e kuri aki kona n taetae.
Ngke e tuangaki bwa e na anga ana taetae, e
teirake n taraan ae kanga ti tebo bwa e aki mama.
I tangiria ni kan riki n aekakina—n aki mama ao
ni kona n taetae. I nakoia mitinare ao n tuangiia
ae I kan riki n aekan mwaneu ao I tuangiia bwa
a na roko n reireinai.

A roko nakon mweengau. Ti kaitibo iaan te
aroka ae te mai ibukina bwa e aki kariaia tamau
bwa a na rin n te auti. Ngaia ae I aki kariniia.
Tinau e mwakuri. Bon ti ngai ma mitinare n taetae
iaan te mai. Ngke I ongora naia rongorongo, ao I
kakoaua. A tuangai bwa n na tataro ao I karaoia.
I ataia bwa e boni koaua. I moanna n nanakon te
taromauri ni katoa Tabati ma mwaneu. A tiku ara
karo n te mweenga, ma a kariaia nakora.

Ngke i nakon te reirei ae rietaata, I kaea te tie-
minari. Ara reirei ae rietata tao 11 te maire man ara
tabo ngaia ae ti toka n te bwati nakon te umwan-
tabu, imwiin te reirei. Ti ira te tieminari ibukin te-
uana te aoa ke e nako riki ao imwiina ti oki nakon
mweengara. I roko ni mweengau tao te aoa 6:00
n te bwakantaa. I reiakina ae batu mairouia taan
reirei, Tari ao Titita Ratkin. A reireiniira taikan Ana
Boki Moomon, te Doctrine ao Covenants, ao te Nu
Tetemanti. A reireiniira naba bwa ngaira ni kabane
boni mitinare. I uota te tienoro nakon kiraati ni
kabane ao ni korea te bwai are I a tia n reiakinna
inanon te tieno. Ni katoa tairiki ni mweengau N na
bae n tibwaua te bwai ae I a tia n reiakinna n te tie-
minari ma au karo. Ibukin tenua te ririki I reireiniia
au karo ni katoa tairiki. I rangin n ingainga ni kan
riki bwa te mitinare.

E a koro nimaua te ririki imwiin are I bwabe-
titoaki. I tibwaua te kaeteti iaon te tieminari ma
au karo inanon tenua te ririki. Iai nanou ae ko-
rakora bwa I tangiria mitinare bwa a na reireinia
au karo. I kaoia mitinare bwa a na roko nakon au
auti ao ni karaoa ara Bootaki n Utu n te Tairiki.
E kariai au Karo bwa a na roko. E a tia n iangoia
bwa e na reirei riki taikan te euangkerio. Imwiin

te Bootaki n Utu n te Tairiki e kaoia mitinare au
Karo bwa a na oki ao ni wakina aia reirei. A roko
ao a reirei. A butimwaea te euangkerio au karo
ao te kakaewenako ni bwabetito. I rangin ni mimi
ibukina bwa e rangin ni momoko tamau, ao te
tia manging naba. Imwiin te reirei iaon Tuan te
Mauri, e ira te bwai are e reireinaki iai irouwia mi-
tinare. Tebongina imwiin te reirei, e aikoa kairoa
ana tikareti. E a tia ni moko ngke te ataei ngaia ao
ngkanne e katokia n te bong anne ao n aki manga
taua te moko imwiina. Ngaia ma tinau a bwabeti-
toaki, ao a tia n rangin ni kakaonimaki ni karokoa
te tai aei. E taekinna tamau bwa n te tai naba are
e bane iai te moan reirei mairouia mitinare, iai te
bwai ae ti teuana ae tangiria ni kani karaoia man
te tai anne. E tangiria ni uotia ana utu nakon te tem-
bora. E korobukin ana kantaninga inanon Maati
2013 ngke ti nakon te Laie, Hawaii tembora ao ni
kabaeaki ni kabane ma ara utu.

Tracy Kennar
David



TAMINE IN ANGANA MOOUN TRACY KENNAR DAVID AO NI KABONGANAKI MA TE KARIAIA

Ngke a titirakinai aomata, "N ningai ae ko tangiria ni kan riki bwa te mitinare?" I kaekaia bwa I tangiria n tainako ni kan riki bwa te mitinare. Man te moan ngke I tuangia au karo, "N tebongina, ko na roko nakon te ekaretia aei"—I tangiria ni kan riki bwa te mitinare. Imwiin au bwabetito a tua-ngai mitinare bwa I kona n nako ni mitinare, ao I tangiria ni kan nako. I tangiria ni kan riki bwa te mitinare ni bwaai aika I karaoi, ao n reirei aika I tibwauai. Ngke e roko te katanoata bwa a kona ataeinaine ngkai ni karaoa aia mition n te ririki ae 19, I bon rangin n rootaki. E akoro 18 au ririki. E tara n ae e a toki. te katauraoi ao te tataninga I moanna ni kanoai au beebea ni mitinare n te tai ae waekoa. Te beretitentii n te titeiki e waekoa ni kanakoi beebea. I rangin kukurei ao n tabeaiangau e kaokaki te beebea. E a manga kanakoaki riki te beebea. E matoatoa te tataninga te kauatai. E a manga kaokaki naba te beebea. I nanokawaki bwa I taku bwa I aki tangiraki. Ma I rangin n tangiria ni kan nako ni mitinare ngaia are I tuanga te beretitentii n te titeiki bwa e na kataia riki. N te tai aei a kanakoa te rongorongo ma te titiraki bwa bukin tera e kaokaki te beebea. E a manga kaokaki te beebea te katenua n tai, ma te kaeka ae kangai bwa I bon rangin ni uarereke. I tangiraki bwa n na tiku n tataninga au koro n ririki n Tuun.

Te kaua n tai ngke ti kanakoi ara beebea bon imwiin raoi au koro n ririki. N te tai aei ao e a butimwaeaki au beebea. I bon rangin kukurei ngke I karekea te wewete nakou nakon te Micronesia Guam Mition.

N au katauraoi ibukin au mitinare, I irira te ki-raati ibukin aia katauraoi mitinare. Ti kakaitibo ni katoa Kaonobong. I waakina au kirati imwiin raoi banen au tai man te reirei. Ti reiakinaki taekan te Babaire ni Kamaiu, ana Boki Moomon, ao kaini-baire ake a kuneaki n Taetaekina Au Euangkerio. Mwakoron te kirati ae tamaroa bon karaoan are e kanga arom ni kawara am aomata ao n reireiniia. Ti ikaruoru ngkoa mitinare ngaira, ao riki bwa te tia kakae. I reireinaki bwa N naki mamaa, ao e rikirake au koaua.

Ngkai I tabe ni iangoi kawai n riki bwa te mitinare, I ataia bwa e kakabwaiai raoi te Uea. I iangoa te moan namakin are I rinanona ni kawaran te aro ngke Ngai ma tinau a iraeaki ara kau. A aki te roko n oki ara kau, ma te Uea e anganira riki ae batiti karekea bwaninin te euangkerio. ■

Te Mitinare ae te Bxaeoniiia

Iroun Julinta Anien

N riki bwa te moan ni kaaina te aro mairouia au utu ao au koraki nako n nako ni mitinare bon te katabeaki are teuana are I a ingainga ni uarekena.

Arau bon Julinta Anien ao I bungiaki i Matiare. Tinau ma tamau a kaaina te aro teutana

te tai imwiin bungiaku ao I uringa nakora n te tembora n aron ae te utu ngke I mena n te moan koraki. Iai uoman tariu, temanna mwaaneu ae e ikawai ao 2 mwaaneu aika uarereke.

N rikirakeu inanon te aro I mataiakinia naake a nako ni

Julinta Anien e beku ngkai n te Olongapo, Philippines Mition



TAMNEIN ANGANANO IROUN JULINTA ANIEN AO NI KABONGANAKIMA TE KARIAIA

mitinare. E taraa n iai te bitaki raoi imarenan te tai are a moan iai aia mwakuri ni mitinare ao ngkana a oki. Iai te tamnei irouia ae a kaokoro iai. A kaota te onimaki E korakora aia koaua, ao a taraa n ae iai ootaia ae itiaki n ana Euangkerio Iesu Kristo.

Au tia kairiri irouia Kairake n Ataeinaine ao tamau a kaungaai bwa N na nako ni mitinare. Ngke e koro 17 au ririki ni maiu I baireia bwa I riai ni wareka ana Boki Moomon. Ngke I moanna man Kabwarabwaraana I waekoa n ataia bwa e koaua te boki aei. E taku Iotebwa Timiti, "I tuangia mataniwin te ekaretia bwa Ana Boki Moomon bon te boki ae te kabanean n eti mai buakon boki nako iaon te aonaaba, ao bon ngaia kingin ana ekaretia, ao e na kaanina riki te Atua te aomata ngkana e iri nanon reirei ake e taekinaki inanona, nakon taian boki riki tabeua."

Tamau, ae bon ngaia kaain ara Beretitentii n te Titeiki, e kaongoai te katanoata n te Maungatabu ni Kabuta n Okitobwa 2012, ni butimwaaia aine n nako ni mitinare n te ririki ae 19. Ngkai e a kaman koro 19 au ririki, I a tia ni kanoaa au beebea ni mitinare n Ritembwa 2012. I weteaki bwa N na beku n te Olongapo, Philippines Mition ao ni moana au mitinare n Tebetembwa 2013.

N tei ibukin ara utu n aron ae te moan mitinare bon te kari-neaki, ao I kakantaninga ni kan riki bwa te mitinare anne are I mamataiakinna irouia aomata. ■

Ana Roro ae Rikirake Biti A Ongo n Ana Wewete te Burabeti n nako ni Beku

Iroun Mereoni Vuidreketi

N 2009 te Fiji LDS Church College, e a moana ana waaki ae kinaaki iaon babairean maiua ataein te reirei rinanon te SSEOP (Student Spiritual Educational Occupational Plan).

Te babaire ibukia angia ake a tia ni bane aia tai man 2009 nakon 2012 e a tia n riki bwa te bwai ae koaua rinanon te bitaki n te ririki ni mitianare ae ai tibwa ngkai. Ake a bane aia tai man 2010 nakon 2012 ake a ukoukorai aia reirei a taona aia babaire ni kaeka moa ana wewete te Uea.

Ataein Koraki 7 n 2012 a tia ni katea te katoto ae tamaroa nakoia tariia ma mwaaneia aika uare-reke. A tia ni kaeka ana wewete te Uea ni karaoan aia mwakuri ni mitinare ae bwanin taina. Angiina mai buakoia a bon kaman kinaiia ngke a kintakaaten, ao ni kari-kirakea aia iraorao are a rootaki iai nanoia aomata aika mwaiti. Waniua te batienti mairouia kairake n ataenimwaane ao ataeinaine a kaotaki iaon aia SSEOP bwa a na nako ni mitinare. Ao angiina mai buakoia a bon mena n te tabo ni mitinare, iaon kawaia n rin n te MTC, a tataninga wete-aria, ke inanon waakinan katiakin aia beebea ni mitinare.

Jovesa Saumaki bon te moan ni karekea weteana man

te kurubu aei mairouia raorona ao e beku ngkai n te Fiji Suva Mition. E rimwiaki iroun Ephraim Maiwiriwiri are e beku n te Rossville California Mition; Kayleanne Solomone, e beku n te Bacolod Philippines Mition; Georgina Balenacagi, e beku n te Hamilton New Zealand Mition; Materita Kaititi, e beku n te Suva Fiji Mition; Melita Matanatabu e beku n te Cauayan Philippines Mition; Jack Moimoi e beku n te Baguio Philippines Mition; ao Serai Qaqanilawa e beku n te Ghana Kumasi Mition. Sam Koi, Loraini Kaibati, ao Vera Sefeti a na moana aia mition n te tai ae aki maan.

Ao naake n te kabane n rain ni katiaakin aia beebea ni mitinare bon Lasarua Tokona, Fane Koyamaibole, Marsela Tokalolo, Josefa Naivaluwaqa ao Latai Kafoa.

Melita Matanatabu, temanna mai buakoia kairake n ataeinaine n aia kurubu ataein te reirei man 2012, bon te moan ni kaaina te aro mairouia ana utu ni karaoa ana mwakuri ni mitinare ae bwanin taina ibukin te Ekaretia. E taku, "E aki toki n reke te nano aei irou ni kan nako ni mitinare, ao ngke e katanoataki kakeerikan kan te ririki I bon rangin kukurei.

E kakorakorai riki ngkai a kataia ni karekeia te aekaki ni kouru aei raoraou n te reirei.”

E reitia neienne, “Kakaean reirein te Ekaretia ao ni karekeia raoraom aika tamaroa ma aroaroia aika nakoraoi a katauraoai raoi.”

Kurubu n rao aikai a raoa i bon imarenaia n aron rabwataia ma a kaan inanon te tamnei ngkai a tibwaua te rongorongo ae kinaaki n kaoia tabeman bwa a “Nakon Kristo”. ■

Aia Iteraniba Ataei

Te Riaona e kainnanoa aia kanakobwai ataei ibukin “Ara Iteraniba.” Ataei man te ririki 3 nakon 12 a kona ni kanakoi aia korotamnei, tamneia, aia koaua, ao baika a rinanona. Aia kotoramnei e kona n ae mweengaia, aia utu, te aonaaba ae katobibia, tembora, karakin booki aika tabubwaai n aekia nako. Ma e ngae n anne, tiaki tamnein te Tia Kamaiu, taiaoka.

Taiaoka karina aran te ataei, ririki, ao rikina, ao uoote ao titeiki / ke aran te mwaanga ke te mwakoro.

Riki, aia kariaia kaaro ni boreti kanakobwai ae a riai ni kairaki (e butimwaeaki te imeeri). A riai ni karaoaki kanakobwai n taetae nako, ao e kona ni karaoaki aonraain n te liahona.lds.org; ma “Ara Iteraniba” n te rain ni botoniango; ke man te meerि nakon:

*Riaona, Ara Iteraniba
50 E. North Temple Street
Salt Lake City, UT 84150-0024,
USA ■*

